

杏軒醫案

續
錄

安徽省衛生廳校訂
安徽人民出版社

R2
71

杏軒醫案續錄序

曩余在都門。知鮑覺生侍讀少邁奇疾。賴程君杏軒獲全。越二十年。覺生視學中州。復病如前。杏軒又起之。心奇其人。以不得一見爲恨。嘉慶丁卯春。余撓疾南歸。遇杏軒於大梁使院。乞刀圭焉。半數年來。殆不知其疾之在體也。丁丑夏。余再至新安。杏軒亦倦遊歸。相見甚喜。晤語浹旬。盡出其所著書數種示余。上溯軒岐。旁及越人仲景。下逮河間東垣丹溪諸家。靡不究其精微。擴其旨趣。就中醫案續錄一編。說理精當。視前刻初集尤佳。余勸其付梓。杏軒讓未遑。余曰。子無然也。余見世所爲醫者多矣。讀湯頭歌括一冊。誦藥性賦一篇。遂榜於門。



不借外

曰醫室。號於人曰醫師。病者不察。從而求診。乞方焉。幸而得貲財。愈益肆其欺謾。乘堅車。策怒馬。馳騁以耀於衢人。尊信之者日益衆。殺人日益多。其不忍爲此態者。又或達心而懦。訥於言語。拙於文詞。爲世所輕。而醫理卒以不明於天下。今先生立盧扁之幟。入孫葛之壘。使是書不脛而走。風行海內。天下望而爭趨。登蒼生於仁壽。甚盛事也。縱山川修阻。鍼砭莫及。世醫即可奉爲準繩。以奏效於旦夕。其善養生者。得領緒餘。亦足以却病駐年。所全不已多乎。夫士君子之托業。國家之設官。皆爲養人計也。先生少業儒術。長習方書。常自恨不得用於世。以竟其學。余觀斯編所載。審是非於毫釐。察虛

實於微渺。其良有司之矜慎以折獄乎。補養以培元氣。和解使無鬱湮。其良有司之和煦以愛民乎。法當攻伐。如厲鷹鷂以逐鳥雀。法當清涼。如沃淵泉以救燎原。其良有司之鋤暴安良。不事姑息乎。吾願與先生同業者。皆以先生之學爲學。其不與先生同業者。皆以先生之心爲心。則郡邑之呻吟皆起矣。先生斯編。顧可秘而不宣乎哉。杏軒曰。唯唯。然猶藏之篋笥。自是又增入數十條。今年春郵寄是書。問序於余。披閱之下。猶記曩在新安。與吾杏軒晤言一室時也。爰追述之以爲序。

道光四年歲次甲申季春月桐城吳賡枚

杏軒醫案續錄序

家弟瑞生。昔遊新安。適遭疔瘡。觀泉先生爲之獨疔。歸述盛名。越數年。予始得見。豐頤藹度。信爲有道者。旣乃讀所刻古近體稿。多隱居沖澹。及壯遊奇麗之作。旣又讀所著醫案。益肅然於先生之爲通儒也。夫醫者意也。必有與天地同流之意。而後能誦古人方藥之書。又必一空膠室方藥之言。而後能伸其用當通神之意。醫果可以意爲。案果可以臆說哉。先生尚有未刻之書。曰醫述。蓋博覽靈素以後歷代諸家之論。採其精當者。萃爲一集。卷帙盈尺。其精勤過於海錄。他日刊布。讀者參考互證。當益知通儒之所闡揚。不僅功侔良相也。

道光六年子月上澣白下侯雲松拜識

杏軒醫案續錄序

內傳稱良醫者再。醫緩視晉侯疾曰。在育之上。膏之下。攻之不可。達之不及。數語卽案也。又醫和視晉侯疾曰。是謂近女室。疾如蠱。非鬼非食。惑以喪志。後及六氣六淫。不節不時。并括內經運氣諸篇精義。所言亦案也。醫案如讞案。根源洞澈。治法精嚴。均繫乎此。顧非博物君子。深于醫理。未足語此。

杏軒先生。於嘉慶九年。刊有醫案初集。隨證處方。靈心獨運。足度後學金針矣。嗣後所聞見益擴。所全活益衆。又彙記治驗若干條。定爲二集。出以示鍾。反覆讀之。彌歎先生之才大心細。師古而不泥于古也。虛實判之。

病。寒燠審之時。南北燥溼因乎地。弱壯貧富視乎人。批卻導竅。有指與物化。而不以心稽之妙。因亟請付梓以善世。其初集藏版。不戒于火。今乃一並補刊。以著雙玉爲珏。鍾蓋于道光丁亥冬日。訪道至巖鎮。親見先生。勤求醫奧。手不釋卷。積數十年博覽之功。年彌高而學彌篤。真所謂博物君子。深於醫理者也。吾願先生自今以往。日記所治。由周甲而晉期頤。靈丹救世無盡。而新編傳世亦無盡。三刻四刻。鍾且不揣樸昧。自訂續爲序言。以期附名于驥尾也。虹橋朱鍾謹序。

杏軒醫案續錄目錄

黃敬修兄咳血。

鮑宗海。風寒喘嗽。誤補肺脹欲絕治驗。

胡某婦臟燥。面論證治方法。

余振如兄幼子胎癰。

柳聖依翁夫人。熱病戰汗而解。

鮑子欽兄。感風停食小恙。猝變虛脫。宜用急療之法。
族婦眩暈。續堂弟媳所患證同。治皆無效。不藥自痊。
洪荔原翁。挾虛傷寒。

洪召亭翁夫人。胎動血暈。急救保全。

曹引泉翁竹筒痢。

王策勳先生幼孫疳疾。

金蔭陶封翁。久瀉滑脫之證。

洪梅渚翁。肝鬱犯胃。痛嘔發黃。溫補藥誤。危而復安。
又乃愛暑邪擾胃。發熱吐瀉。欲作驚搐。

又乃郎溼溫感證。

張汝功兄乃郎。嗽久傷陰。奇治驗。

又令愛暑入心包。拯治無功。後見數人證同。皆不可
救。并答門人四問。

葉蔚如兄。脇痛便閉。一劑而效。

曹靜川翁孫女。頰脫音啞。

堂妹吐證。

方萃巖翁乃郎。跌後又患腹痛。藥傷胃氣治驗。

又翁自患陰疽。復中寒陽脫。救急治法。

次兒光輝。單腹脹奇驗。

巴聲茂生。佈痘癰閉險逆。一劑救轉。

答鮑北山翁。詢伊郎飲澹證治始末。并商善後之策。

許玉書翁大郎。腹痛吐瀉危證拯治之奇。

又次郎脾腎陽虛。伏寒凝沍。重用溫補而瘳。

鮑宅京翁僕人。中寒暴脫。救轉之奇。

許綱之兄齒痛。

鮑智原翁令孫。痘後鬼腫潰久。藥投溫補而愈。

吳尚時兄。春溫兩感危證治愈。附載鄭晉康兄令弟。

病同致殂之故。并誨門人。

家茂生兄。怔忡治法。

汪靖臣兄乃郎。冒暑瀉甚欲脫。亟挽元氣一法。

又幼女外感咳嗽。誤藥釀成肺痺急證。

黃曙堂翁乃郎。頭痛忽變癰厥。續見數證。皆不治。

家秀翹兄。肝鬱痛傷胃氣。詳論病機治法。

別駕菽田何公僕婦子癰。

鮑覺生宮詹。病發三次。不能復起。

黃就唐表兄。脘痛嘔吐。危證治驗。

燕雲亭司馬。伏暑感證。

饒君揚翁公郎。風溫證治原委。

饒厚卿兄幼女。因熱生風之證。治愈并明其理。

又僕人肝風。用藥大意。

許兌巖兄尊堂。久痢治驗。

許月隣翁令愛齒衄。

族弟義家。血湧欲脫。

何少君令政。傳尸蟲異。附載歷見諸證。并詳治法。

汪紹由翁尊堂。脫證救甦。

汪商彝翁夫人。風寒襲絡之證。

予久患腹痛。忽下瘀血而痊。

杏軒醫案續錄

新安杏軒程文囿觀泉甫著

男 孫

光臺芸甫校
光輝丹甫校
書酉山
春序先錄

黃敬修兄咳血。

敬兄向在金華貿易。恙患咳血。醫治無效。食微肌瘦。慮成損怯。予時至蘭谿。友人薦延診視。閱前諸方。偏於溫補。謂曰。古人治血證。雖有此法。然須審其證屬虛寒。方爲合轍。據茲脈證。責諸肺腎陰虧。肝陽上僭。咳甚火炎。血隨溢出。理應滋水生木。潤肺保金。得以咳稀。血當自

止服藥投機。予欲辭回。敬兄固留。爲治月餘。咳血全好。餐加神旺。肌肉復生。

鮑宗海風寒喘嗽誤補肺脹欲絕治驗。

黃敬修兄店內。有同事鮑宗海者。因感風寒。喘嗽多日。就彼地某姓老醫看視。謂其證屬內虧。藥與地歸參朮。予見方勸其勿服。宗海以爲伊體素虛。老醫見識不謬。潛服其藥。是夜喘嗽益甚。次日復往加減。醫謂前藥尚輕。更增黃耆五味子。服後胸高氣築。莫能臥下。呬呀不休。閉悶欲絕。敬兄詢知其故。囑予拯治。予曰。前藥吾原勸其勿服。伊不之信。况加酸斂。邪錮益堅。如何排解。敬兄云。渠與我同事多年。不忍見其死而不救。揣摩至再。

立方用麻黃桂枝細辛半夏甘草生薑杏仁葶藶子并
語之曰。此乃風寒客肺。氣阻痰凝。因而喘嗽。醫不開解。
反投斂補。以致閉者愈閉。壅者愈壅。釀成肺脹危證。金
匱云。咳逆倚息不得臥。小青龍湯主之。予於方中除五
味白芍之酸收。加葶藶杏仁之苦瀉者。蓋肺苦氣上逆。
急食苦以瀉之。如救眉燃。不容緩待也。敬兄欣以爲然。
卽令市藥煎服少頃。嗽出稠痰兩盂。胸膈頓寬。再服復
渣。又吐痰涎盡許。喘定能臥。宗海始悟前藥之誤。泣求
救援。予笑曰。無妨。枉自喫幾日苦耳。次劑麻桂等味分
兩減輕。參入桔梗橘紅茯苓蘇子。更爲調和肺胃而痊。

胡某婦臟燥。面論證治方法。

長林胡某。延診婦病。據述證經半載。外無寒熱。飲食月事如常。惟時時悲泣。勸之不止。詢其何故。伊不自知。延醫多人。有云抑鬱用逍遙散者。有云痰火用溫膽湯者。藥俱不效。又疑邪祟。禳禱無靈。咸稱怪證。懇爲診治。視畢出語某曰。易治耳。立方藥用甘草小麥大棗。某問病名。及用藥方法。予曰。病名臟燥。方乃甘麥大棗湯。詳載金匱玉函中。未見是書。不識病名。焉知治法。宜乎目爲怪證也。某曰。適承指教。足見高明。但拙荆病久。諸治無功。尊方藥只三味。且皆平淡。未卜果能去疾否。予曰。此仲聖祖方。神化莫測。必效無疑。服之果驗。

余振如兄幼子胎癰。